



Nivi Rosing, Inuit Ataqatigiit  
Inatsisartunut ilaasortaq  
[Inatsisartut@inatsisartut.gl](mailto:Inatsisartut@inatsisartut.gl)

## Inuusuttunut inissiat pillugit § 37 naapertorlugu apeqquteqaammut 2026-151-mut akissut

Dato: 13-08-2026  
Sagsnr.: 2026 - 14232  
AKT. ID.: 26710292

Asasara Nivi Rosing

Inatsisartut suleriaasianni § 37 naapertorlugu inuusuttunut inissiat pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: [box909@nanoq.gl](mailto:box909@nanoq.gl)  
[www.naalakkersuisut.gl](http://www.naalakkersuisut.gl)

### Apeqqut 1. Sineriami inuusuttunut inissiat sanaartorneri qanoq ingerlappat?

#### a. Illoqarfiit sorlarni piareernikuuppat?

**Akissut:** Inuusuttunut inissiat pilersaarutaasut amerlasuut naammassineqareerput atorineqalereerlutillu. Suliut uku naammassisimalerput:

- Qaanaaq (inissiat 6-it)
- Upernavik imm. 1 (inissiat 4-t)
- Upernavik imm. 2 (inissiat 3-t)
- Uummannaq (inissiat 8-t)
- Kangaatsiaq (inissiat 8-t)
- Qasigiannuguit imm. 1 (inissiat 4-t)
- Qeqertarsuaq (inissiat 4-t)
- Ittoqqortoormiit (inissiat 4-t)
- Tasiilaq imm. 1 (inissiat 8-t)

Illut naammassisimasut ukiumi ataatsimi tallimaniluunniit qularnaveeqqusiiffiupput.

#### b. Illoqarfinni piareerneqanngitsut sumut killippat?

**Akissut:** Suli suliut arlallit sanaartorfiupput inaarsaaffiullutilluunniit:

- Kullorsuaq (inissiat 2-t) – 2026-p naanerani atulertussatut naatsorsuutigineqarput.
- Nuussuaq (inissiat 2-t) – 2026-p naanerani atulertussatut naatsorsuutigineqarput.
- Qasigiannuguit imm 2 (inissiat -t) – 2027-p aallartinnerani atulertussatut naatsorsuutigineqarput.
- Nanortalik (inissiat 4-t) – 2026-mi septembarimi atulertussatut naatsorsuutigineqarput.

- Narsaq imm. 1 (inissiat 4-t) – amigaatinik iluarsaassineq ingerlavoq, 2026-mi aggustip naanerani atulertussatut naatsorsuutigineqarput.
- Narsaq imm. 2 (inissiat 4-t) – 2026-p naanerani atulertussatut naatsorsuutigineqarput.
- Tasiilami inuussuttunut inissialortiternermi imm. 2 unitsikkallarnejarpoq, nunaminertanut tunngassuteqartut kommunimit paasineqarnissaat suli amigaatigineqarmat.
- Kangaamiut (inissiat 2-t) – suliariumannittussarsiuussinermi neqeroorutitut akigititaasut qaffasippallaarmata suliassaq taamaatikkallarnejarpoq.
- Sarfannguit (inissiat 2-t) – suliariumannittussarsiuussinermi neqeroorutitut akigititaasut qaffasippallaarmata suliassaq taamaatikkallarnejarpoq.

## **Apeqqu 2. Qaqugu naatsorsuutigissavarput tamakkiisumik piareernissaat?**

**Akissut:** Apeqqu 2 b-mut akissut takuuk.

## **Apeqqu 3. Piareernikuni tamaasa atornejarpat?**

### **a. Siunertaminnut atornejarpat?**

**Akissut:** Aap, tunngaviusumik inissiat inuussuttunut inissiatut atornejarput. Sumiiffinnili ataasiakkaani qinnuteqaatinik, inuussuttunut inissianik tunniussinissamut piumasaqaatinik naammassinniffiusunik pissarsiniarneq ajornakusoortoq paasineqarpoq.

Inoqarfinni assigiinngitsuni arfineq pingasuni inuussuttunut inissiat 49-t naammassineqarsimapput. Inissiat amerlanersaat innersuunneqarsimapput, aammalu innersuussinissamut aalajangersakkat, kontomut pingaarnermut 72.10.16 Inissianik attartortittakkanik ingerlatsineq oqaasertaliussani aalajangersarneqartut naapertorlugit attartortunit nutaanit iserterfigineqareerlutik.

Inoqarfinnili ataasiakkaani attartortussanik naleqquttunik, inuussuttunut inissianut innersuunneqarnissamik kissaateqartunik nassaarnissaq iluatsinngitsoorpoq. 2026-mi aggustip aallartinnerani INI A/S ilisimatitsivoq, Kangaatsiami aamma Qeqertarsuarmi attartortussanik, inuussuttunut inissianik tunniussinissamut piumasaqaatinik naammassinnittunik nassaarnissaq unammillernartog, taakkunanilu inuussuttunut inissiat sisamat aamma pingasut inoqanngitsut. Illoqarfinni allani attartortunik taarsiinermut atatillugu Uummannami aamma Tasiilami inissiamik ataatsimik inoqanngitsorpoq.

Naalakkersuisoqarfik INI A/S suleqatigalugu sumiiffinni attartortitsinissamik ajornakusoortitsiffiusuni kommuninut aamma najukkani ataatsimiititalianut attaveqarpoq, kiisalu najukkani suleqatigiinnot allagartanik saqqummiussuivoq attartorsinnaasunullu toqqaannartumik attaveqarluni. Taamatuttaaq INI A/S aqqqissuussineq ilisimaneqarnerulersinniarlugu Facebook-ikkut nittartakkani aqqutigalugu siaruarterilluni misilippaa, kisiannili suliniutit taakku arlaannaalluunniit attartortussanik naleqquttunik nalunaartoqarneranik inernejanngilaq.

Kantomut pingaarnermut 72.10.16 Inissianik attartortittakkanik ingerlatsineq oqaasertaliussami nr. 10-mi imm. 9 naapertorlugu, inuussuttunut inissianut qinnuteqartunik tunineqarsinnaatitaasunik peqanngippat, inuussuttunut inissiat

inissarsiorturnut, utaqqisut allattorsimaffianni nalinginnaasumi allatsissimasunut attartortinneqarsinnaapput. Tassalu periarfissat tamaasa misilinneqareernerini inuusuttunut inissiat inoqanngitsut utaqqisut allattorsimaffianni nalinginnaasumi allatsissimasunut allanut innersuunneqarsinnaapput. Tamatuma kingorna inuusuttunut inissiat piumaneqarneri annertuseqqissappat, inissiat inuerunnerminni inuusuttunut inissiatut innersuunneqarqissinnaapput.

Tassunga tunngatillugu Ittoqqortoormiini Tasiilamilu inuusuttunut inissiat Kommuneqarfik Sermersuumut tunniunneqarnissaat Inatsisartut Aningaasaqarnermut Akileraartarnermullu Ataatsimiititaliamit akuerineqarpoq. Piginnittuunermet allagartanik il.il. suliaqarluni tunniussinissamut suliasat ingerlanneqarput.

Tunniussineq aqutsinerup pisariinnerulernissaanut iluaqutaassaaq, innersuussinissamut, ingerlatsinermet anisitsinerillu isumagineqarnerinut akisussaaffik kommunimi katersuutsinneqartussaammat. Namminersorlutik Oqartussat Tunumi inissiaatini Kommuneqarfik Sermersuumut tunniutereerpai, taamaattumillu inuusuttunut inissianik taamatut tunniussineq tamatuma malitsigiinnartussaavaa. INI A/S Tunumi najukkani najuutinngilaq, taamaattumillu aqutsinermi najukkaniit killilimmik ikiuttoqartarnera pisariaqartinneqarpoq. Tamatuma peqatigisaanik paasineqarpoq, Namminersorlutik Oqartussat inissiaatileqatigiiffik Iserit A/S, kommunimit pigineqartoq akunnermuliuttutut ikiortigalugu aqutsinermik isumaginnittuunertik ingerlatiinnassappassuk, tamanna kommuninut piginnaatitsissummi sinaakkusiussat iluanni pisinnaanngitsaq.

#### **Apeqqut 4. Naalakkersuisut inuusuttut inissiaat pillugit allanik oqaatigisassaqarpat?**

**Akissut:** Naalakkersuisuniit kommunit aamma INI A/S suleqatigalugit suliani ataasiakkaani ineriartornerit ingerlaavartut malinnaaffigineqarput. Sanaartornerup nalaani inuusuttut inissianik naleqquttunik pissarsisinnaanissaannik nukittorsaanerup ingerlaannarnissaa, tamatumalu peqatigisaanik inissiaatit pitsaanerpaamik atorneqarnissaanissaat anguniagaavoq.

Najukkani pissutsit peqqutaallutik inissiat inuusuttunut inissiatut attartortinnissaannik ajornakusoortitsiffiusuni eqaatsumik aaqqiinissat sulissutigineqarput, taamaalilluni inissiat innuttaasunut inissianik pisariaqartitsisunut iluaqutaaginnarsinnaassammata.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Iddimangiiu Jensen Bianco